

# The Letters of Pliny the Younger

## Low-Segmentation Acceleration Reader

© Claude Pavur 1998 Saint Louis University

This material is made freely available for non-commercial academic use.

For further information on the text, see <http://www.slu.edu/colleges/AS/languages/tchmat.html>

Note: Where the syntax allowed it, I have aimed to divide the lines into intelligible sub-units that can be mastered as such, even out of context. But I have also wanted to make clear parallelisms and to keep the phrase lengths short and manageable.

Where Greek is quoted, you may need to have the proper font installed on your system to see the Greek characters.

Last revised May 26, 1998.

### I LIBER PRIMVS

#### I. 1 C.~ PLINIVS SEPTICIO CLARO SVO S.

Frequenter hortatus es  
ut epistulas,  
si quas paulo curatius scripsissem,  
colligerem publicaremque.

Collegi  
non seruato temporis ordine  
(neque enim historiam componebam),  
sed  
ut quaeque in manus uenerat.

Superest  
ut nec te consilii nec me paeniteat obsequii.

Ita enim fiet,  
ut eas  
quae adhuc neglectae iacent  
requiram  
et  
si quas addidero  
non supprimam.

Vale.

#### I. 2 C.~ PLINIVS MATVRO ARRIANO SVO S.

Quia tardiozem aduentum tuum prospicio,  
librum  
quem prioribus epistulis promiseram  
exhibeo.

Hunc rogo  
ex consuetudine tua  
et legas et emendes,  
eo magis quod  
nihil ante peraeque eodem **zhI**%  
scripsisse uideor.

Temptauit enim imitari  
Demosthenen semper tuum,  
Caluum nuper meum,  
dumtaxat figuris orationis;

nam uim tantorum uirorum,  
'pauci quos aequus...'  
adsequi possunt.

Nec materia ipsa  
huic  
(uereor ne improbe dicam)  
aemulationi  
repugnauit:

erat enim prope tota in contentione dicendi,  
quod me longae desidia indormientem excitauit,  
si modo is sum ego  
qui excitari possim.

Non tamen omnino  
Marci nostri **Ihkuqouj** fugimus,  
quotiens paulum itinere decedere  
non intempestiuis amoenitatibus  
admonebamur:

acres enim esse  
non tristes  
uolebamus.

Nec est quod  
putes  
me sub hac exceptione ueniam postulare.

Nam quo magis intendam limam tuam,  
confitebor  
et ipsum me et contubernales  
ab editione non abhorreere,  
si modo tu fortasse  
errori nostro album calculum adieceris.

Est enim plane aliquid edendum--

atque utinam hoc potissimum  
quod paratum est!  
audis desidia uotum--  
edendum autem ex pluribus causis,  
maxime quod  
libelli  
quos emisimus  
dicuntur in manibus esse,  
quamuis iam gratiam nouitatis exuerint;

nisi tamen auribus nostris bibliopolae blandiuntur.

Sed sane blandiantur,  
dum per hoc mendacium  
nobis studia nostra commendent.

Vale.

### I. 3 C.~ PLINIUS CANINIO RVFO SVO S.

Quid agit Comum,  
tuae meaeque deliciae?

quid suburbanum amoenissimum,  
quid illa porticus uerna semper,  
quid platanon opacissimus,  
quid euripus uiridis et gemmeus,  
quid subiectus et seruiens lacus,  
quid illa mollis et tamen solida gestatio,  
quid balineum illud  
quod plurimus sol implet et circumit,  
quid triclinia illa popularia illa paucorum,  
quid cubicula diurna nocturna?

Possident te  
et per uices partiuntur?

an,  
ut solebas,  
intentione rei familiaris obeundae  
crebris excursionibus auocaris?

Si possident,  
felix beatusque es;

si minus,  
'unus ex multis'.

Quin tu  
(tempus enim)  
humiles et sordidas curas aliis mandas,  
et ipse te  
in alto isto pinguique secessu  
studiis adseris?

Hoc sit negotium tuum  
hoc otium;

hic labor  
haec quies;

in his uigilia,  
in his etiam somnus  
reponatur.

Effinge aliquid  
et excude,  
quod sit perpetuo tuum.

Nam reliqua rerum tuarum post te  
alium atque alium dominum sortientur,  
hoc numquam tuum desinet esse  
si semel coeperit.

Scio  
quem animum,  
quod hortet ingenium;

tu modo enitere  
ut tibi ipse sis tanti,  
quanti uideberis aliis  
si tibi fueris.

Vale.

### I. 4 C.~ PLINIUS POMPEIAE CELERINAE SOCRVI S.

Quantum copiarum  
in Ocriculano,  
in Narniensi,  
in Carsulano,  
in Perusino tuo,  
in Narniensi uero etiam balineum!

Ex epistulis meis,  
nam iam tuis  
opus non est:  
una illa breuis et uetus sufficit.

Non mehercule tam mea sunt  
quae mea sunt,  
quam  
quae tua;

hoc tamen differunt,  
quod sollicitius et intentius  
tui me  
quam mei  
excipiunt.

Idem fortasse eueniet tibi,  
si quando in nostra deuerteris.

Quod uelim facias,  
primum

ut perinde nostris rebus ac nos tuis perfruaris,  
deinde  
ut mei expergiscantur aliquando,  
qui me secure ac prope neglegenter exspectant.

Nam mitium dominorum apud seruos  
ipsâ consuetudine  
metus exolescit;

nouitatibus excitantur,  
probarique dominis  
per alios magis quam per ipsos  
laborant.

Vale.

### I. 5 C.~ PLINIUS VOCONIO ROMANO SVO S.

Vidistine quemquam  
M.~Regulo timidiorum humiliorem  
post Domitiani mortem?

sub quo  
non minora flagitia commiserat  
quam sub Nerone  
sed tectiora.

Coepit uereri  
ne sibi irascerer,  
nec fallebatur:

irascebar.

Rustici Aruleni periculum fouerat,  
exultauerat morte;

adeo  
ut librum recitaret publicaretque,  
in quo Rusticum insectatur  
atque etiam  
'Stoicorum simiam' adpellat,  
adicit  
'Vitelliana cicatrice stigmosum'  
(agnoscis eloquentiam Reguli),  
lacerat Herennium Senecionem  
tam intemperanter quidem,  
ut dixerit ei Mettius Carus

'Quid tibi cum meis mortuis?

Numquid ego Crasso aut Camerino  
molestus sum?'

quos ille sub Nerone accusauerat.

Haec me Regulus dolenter tulisse credebat,  
ideoque etiam

cum recitaret librum  
non adhibuerat.

Praeterea reminiscebatur,  
quam capitaliter ipsum me apud centumuiros  
laccessisset.

Aderam Arrionillae Timonis uxori,  
rogatu Aruleni Rustici;  
Regulus contra.

Nitebatur nos in parte causae  
sententia Metti Modesti optimi uiri:

is tunc in exilio erat,  
a Domitiano relegatus.

Ecce tibi Regulus  
'Quaero,' inquit,  
'Secunde,  
quid de Modesto sentias.'

Vides  
quod periculum,  
si respondi'ssem 'bene';  
quod flagitium  
si 'male'.

Non possum dicere aliud tunc  
mihi quam deos adfuisse.

'Respondebo' inquam  
'si de hoc centumuiro iudicaturi sunt.'

Rursus ille:

'Quaero,  
quid de Modesto sentias.'

Iterum ego:

'Solebant testes  
in reos, non in damnatos  
interrogari.'

Tertio ille:  
'Non iam quid de Modesto,  
sed quid de pietate Modesti sentias  
quaero.'

'Quaeris' inquam  
'quid sentiam;

at ego ne interrogare quidem fas puto,  
de quo pronuntiatum est.'

Conticuit;

me laus et gratulatio secuta est,  
quod  
nec famam meam aliquo responso  
utili fortasse,  
inhonesto tamen  
laeseram,  
nec me  
laqueis tam insidiosae interrogationis  
inuolueram.

Nunc ergo conscientiam exterritus  
adprehendit Caecilium Celerem,  
mox Fabium Iustum;

rogat  
ut me sibi reconcilient.

Nec contentus peruenit ad Spurrinam;

huic suppliciter,  
ut est  
cum timet abiectissimus:

'Rogo  
mane uideas Plinium domi,  
sed plane mane  
(neque enim ferre diutius sollicitudinem possum),  
et quoquo modo efficias,  
ne mihi irascatur.'

Euigilaueram;

nuntius a Spurrinna:

'Venio ad te.'

'Immo ego ad te.'

Coimus in porticum Liuiaie,  
cum alter ad alterum tenderemus.

Exponit Reguli mandata,  
addit preces suas,  
ut decebat optimum uirum pro dissimillimo,  
parce.

Cui ego:

'Dispicias ipse  
quid renuntiandum Regulo  
potes.

Te decipi a me  
non oportet.

Exspecto Mauricum'  
(nondum ab exsilio uenerat):

'ideo nihil alterutram in partem  
respondere tibi possum,  
facturus  
quidquid ille decreuerit;

illum enim esse huius consilii ducem,  
me comitem  
decet.'

Paucos post dies  
ipse me Regulus conuenit  
in praetoris officio;

illuc persecutus secretum petit;

ait  
timere se  
ne animo meo penitus haereret,  
quod in centumuirali iudicio aliquando dixisset,  
cum responderet mihi et Satrio Rufo:

'Satrius Rufus,  
cui non est cum Cicerone aemulatio  
et  
qui contentus est eloquentiam saeculi nostri'.

Respondi  
nunc me intellegere  
maligne dictum  
quia ipse confiteretur,  
ceterum potuisse  
honorificum existimari.

'Est enim' inquam  
'mihi cum Cicerone aemulatio,  
nec sum contentus eloquentiam saeculi nostri;

nam stultissimum credo  
ad imitandum non optima quaeque  
proponere.

Sed tu  
qui huius iudicii meministi,  
cur illius oblitus es,  
in quo me interrogasti,  
quid de Metti Modesti pietate sentirem?'

Expalluit notabiliter,  
quamuis palleat semper,  
et haesitabundus:

'Interrogauit  
non ut tibi nocerem,  
sed  
ut Modesto.'

Vide hominis crudelitatem,  
qui se non dissimulet

exsuli nocere uoluisse.

Subiunxit egregiam causam:

'Scripsit' inquit  
'in epistula quadam,  
quae apud Domitianum recitata est:

"Regulus,  
omnium bipedum nequissimus";

quod quidem Modestus uerissime scripserat.

Hic fere nobis sermonis terminus;

neque enim uolui progredi longius,  
ut mihi omnia libera seruarem  
dum Mauricus uenit.

Nec me praeterit  
esse Regulum **du ska qa i re ton**

est enim locuples, factiosus,  
curatur a multis,  
timetur a pluribus,  
quod plerumque fortius amore est.

Potest tamen fieri  
ut haec concussa labantur;

nam gratia malorum  
tam infida est  
quam ipsi.

Verum,  
ut idem saepius dicam,  
exspecto Mauricum.

Vir est grauis prudens,  
multis experimentis eruditus,  
et qui futura possit ex praeteritis prouidere.

Mihi  
et temptandi aliquid  
et quiescendi illo auctore  
ratio constabit.

Haec tibi scripsi,  
quia aequum erat  
te pro amore mutuo  
non solum omnia mea facta dictaque,  
uerum etiam consilia cognoscere.

Vale.

## I. 6 C.~ PLINIUS CORNELIO TACITO SVO S.

Ridebis,  
et licet rideas.

Ego,  
ille quem nosti,  
apros tres et quidem pulcherrimos cepi.

'Ipse?' inquis.

Ipse;

non tamen  
ut omnino ab inertia mea et quiete discederem.

Ad retia sedebam;

erat in proximo non uenabulum aut lancea,  
sed stilus et pugillares;

meditabar aliquid  
enotabamque,  
ut  
si manus uacuas,  
plenas tamen ceras reportarem.

Non est quod  
contemnas hoc studendi genus;

mirum est  
ut animus agitatione motuque corporis excitetur;

iam undique  
siluae et solitudo ipsumque illud silentium  
quod uenationi datur,  
magna cogitationis incitamenta sunt.

Proinde cum uenabere,  
licebit auctore me  
ut panarium et lagunculam  
sic etiam pugillares feras:

experieris  
non Dianam magis montibus  
quam Mineruam inerrare.

Vale.

## I. 7 C.~ PLINIUS OCTAVIO RVFO SVO S.

Vide  
in quo me fastigio collocaris,  
cum mihi  
idem potestatis  
idemque regni

dederis  
quod Homerus Ioui Optimo Maximo:

**tw=d' eferon men ehwke pa thr',  
eferon d' a heneusen**

Nam ego quoque  
simili nutu ac renutu  
respondere uoto tuo possum.

Etenim,  
sicut fas est mihi,  
praesertim te exigente,  
excusare Baeticis contra unum hominem  
aduocationem,  
ita nec fidei nostrae nec constantiae  
quam diligis  
conuenit,  
adesse contra prouinciam  
quam  
tot officiis, tot laboribus, tot etiam periculis meis  
aliquando deuinxerim.

Tenebo ergo hoc temperamentum,  
ut ex duobus,  
quorum alterutrum petis,  
eligam id potius,  
in quo  
non solum studio tuo  
uerum etiam iudicio  
satisfaciam.

Neque enim tantopere  
mihi considerandum est,  
quid uir optimus in praesentia uelis,  
quam  
quid semper sis probaturus.

Me circa idus Octobris spero Romae futurum,  
eademque haec praesentem  
quoque tua meaque fide Gallo confirmaturum;

cui tamen iam nunc licet  
spondeas de animo meo  
**h)ka i'kua nehsin ep' ofrusi neuse.**

Cur enim non usquequaque  
Homeris uersibus agam tecum?

quatenus tu  
me tuis agere  
non pateris,  
quorum tanta cupiditate ardeo,  
ut uidear mihi  
hac sola mercede posse corrumpi,  
ut uel contra Baeticos adsim.

Paene praeterii,  
quod minime praetereundum fuit,  
accepisse me careotas optimas,  
quae nunc cum ficis et boletis certandum habent.

Vale.

## I. 8 C.~ PLINIVS POMPEIO SATVRNINO SVO S.

Peropportune mihi redditae sunt litterae tuae  
quibus flagitabas,  
ut tibi aliquid ex scriptis meis mitterem,  
cum ego id ipsum destinassem.

Addidisti ergo calcaria sponte currenti,  
pariterque  
et tibi ueniam recusandi laboris  
et mihi exigendi uerecundiam  
sustulisti.

Nam  
nec me timide uti decet  
eo quod oblatum est,  
nec te grauari  
quod depoposcisti.

Non est tamen quod  
ab homine desidioso  
aliquid noui operis  
exspectes.

Petiturus sum enim  
ut rursus uaces sermoni  
quem apud municipes meos habui  
bibliothecam dedicaturus.

Memini quidem  
te iam quaedam adnotasse,  
sed generaliter;

ideo nunc rogo  
ut non tantum uniuersitati eius attendas,  
uerum etiam particulas  
qua soles limâ persequaris.

Erit enim  
et post emendationem  
liberum nobis  
uel publicare uel continere.

Quin immo fortasse  
hanc ipsam cunctationem nostram  
in alterutram sententiam  
emendationis ratio deducet,  
quae  
aut indignum editione  
dum saepius retractat inueniet,

aut dignum  
dum id ipsum experitur  
efficiet.

Quamquam huius cunctationis meae causae  
non tam in scriptis  
quam in ipso materiae genere  
consistunt:

est enim paulo quasi gloriosius et elatius.

Onerabit hoc modestiam nostram,  
etiamsi stilus ipse pressus demissusque fuerit,  
propterea quod  
cogimur  
cum de munificentia parentum nostrorum  
tum de nostra  
disputare.

Anceps hic et lubricus  
locus est,  
etiam cum illi necessitas lenocinatur.

Etenim si alienae quoque laudes  
parum aequis auribus  
accipi solent,  
quam difficile est obtinere,  
ne molesta uideatur  
oratio de se aut de suis disserentis!

Nam  
cum ipsi honestati  
tum aliquanto magis gloriae eius praedicationique  
inuidemus,  
atque ea demum recte  
facta  
minus detorquemus et carpimus,  
quae in obscuritate et silentio reponuntur.

Qua ex causa  
saepe ipse mecum,  
nobisne tantum,  
quidquid est istud,  
composuisse  
an et aliis debeamus.

Ut nobis,  
admonet illud,  
quod pleraque  
quae sunt agenda rei necessaria,  
eadem peracta  
nec utilitatem parem  
nec gratiam  
retinent.

Ac,  
ne longius exempla repetamus,  
quid utilius fuit

quam  
munificentiae rationem etiam stilo prosequi?

Per hoc enim adsequebatur,  
primum  
ut honestis cogitationibus immoraremur,  
deinde  
ut pulchritudinem illarum longiore tractatu  
peruideremus,  
postremo  
ut subitae largitionis comitem paenitentiam  
caueremus.

Nascebatur ex his  
exercitatio quaedam contemnendae pecuniae.

Nam  
cum omnes homines ad custodiam eius natura  
restrinxerit,  
nos contra  
multum ac diu pensitatus amor liberalitatis  
communibus auaritiae uinculis eximebat,  
tantoque laudabilior munificentia nostra fore  
uidebatur,  
quod ad illam  
non impetu quodam,  
sed consilio  
trahebatur.

Accedebat his causis,  
quod  
non ludos aut gladiatores  
sed annuos sumptus in alimenta ingenuorum  
pollicebatur.

Oculorum porro et aurium uoluptates  
adeo non egent commendatione,  
ut non  
tam incitari debeant oratione  
quam reprimi;

ut uero aliquis  
libenter educationis taedium laboremque suscipiat,  
non praemiis modo  
uerum etiam exquisitis adhortationibus  
impetrandum est.

Nam  
si medici salubres sed uoluptate carentes cibos  
blandioribus adloquiis prosequuntur,  
quanto magis decuit  
publice consulentem utilissimum munus,  
sed non perinde populare,  
comitate orationis inducere?

praesertim cum enitendum haberemus,  
ut  
quod parentibus dabatur

et orbis probaretur,  
honoremque paucorum ceteri patienter  
et exspectarent  
et mererentur.

Sed  
ut tunc  
communibus magis commodis  
quam  
priuatae iactantiae  
studebamus,  
cum  
intentionem effectumque muneris nostri  
uellemus intellegi,  
ita nunc in ratione edendi ueremur,  
ne forte  
non aliorum utilitatibus  
sed propriae laudi  
seruisse uideamur.

Praeterea meminimus  
quanto maiore animo  
honestatis fructus in conscientia  
quam  
in fama reponatur.

Sequi enim gloria,  
non adpeti debet,  
nec,  
si casu aliquo non sequatur,  
idcirco quod gloriam meruit  
minus pulchrum est.

Ii uero,  
qui benefacta sua uerbis adornant,  
non ideo praedicare  
quia fecerint,  
sed  
ut praedicarent  
fecisse creduntur.

Sic  
quod magnificum  
referente alio  
fuisset,  
ipso qui gesserat recensente  
uanescit;

homines enim  
cum rem destruere non possunt,  
iactationem eius incessunt.

Ita  
si silenda feceris,  
factum ipsum,  
si laudanda non sileas,  
ipse culparis.

Me uero peculiaris quaedam impedit ratio.

Etenim hunc ipsum sermonem  
non apud populum,  
sed apud decuriones habui,  
nec in propatulo  
sed in curia.

Vereor ergo  
ut sit satis congruens,  
cum in dicendo  
adsentationem uulgi adclamationemque  
defugerim,  
nunc eadem illa editione sectari,  
cumque plebem ipsam,  
cui consulebatur,  
limine curiae parietibusque discreuerim,  
ne quam in speciem ambitionis inciderem,  
nunc eos etiam,  
ad quos ex munere nostro  
nihil pertinet praeter exemplum,  
uelut obuia ostentatione conquerere.

Habes cunctationis meae causas;

obsequar tamen consilio tuo,  
cuius mihi auctoritas pro ratione sufficiet.

Vale.

## **I. 9 C.~ PLINIUS MINICIO FVNDANO SVO S.**

Mirum est  
quam singulis diebus in urbe  
ratio  
aut constet  
aut constare uideatur,  
pluribus iunctisque  
non constet.

Nam  
si quem interrogas  
'Hodie quid egisti?',  
respondeat:

'Officio togae uirilis interfui,  
sponsalia aut nuptias frequentauit,  
ille me ad signandum testamentum,  
ille in aduocationem,  
ille in consilium rogauit.'

Haec  
quo die feceris,  
necessaria,  
eadem,  
si cotidie fecisse te reputes,  
inania uidentur,

multo magis  
cum secesseris.

Tunc enim subit recordatio:

'Quot dies quam frigidis rebus absumpsi!'

Quod euenit mihi,  
postquam in Laurentino meo  
aut lego aliquid  
aut scribo  
aut etiam corpori uaco,  
cuius fulturis animus sustinetur.

Nihil audio  
quod audisse,  
nihil dico  
quod dixisse  
paeniteat;

nemo apud me quemquam  
sinistris sermonibus carpit,  
neminem ipse reprehendo,  
nisi tamen me  
cum parum commode scribo;

nulla spe  
nullo timore  
sollicitor,  
nullis rumoribus inquietor:

mecum tantum  
et  
cum libellis  
loquor.

O rectam sinceramque uitam!

O dulce otium honestumque  
ac paene omni negotio pulchrius!

O mare,  
o litus,  
uerum secretumque **museion**,  
quam multa inuenitis,  
quam multa dictatis!

Proinde tu quoque  
strepitum istum  
inanemque discursum  
et multum ineptos labores,  
ut primum fuerit occasio,  
relinque  
teque studiis uel otio trade.

Satius est enim,  
ut Atilius noster  
eruditissime simul et facetissime dixit,

otiosum esse  
quam  
nihil agere.

Vale.

## I. 10 C.~ PLINIUS ATTIO CLEMENTI SVO S.

Si quando  
urbs nostra liberalibus studiis floruit,  
nunc  
maxime floret.

Multa claraque  
exempla sunt;

sufficeret unum,  
Euphrates philosophus.

Hunc ego in Syria,  
cum adulescentulus militarem,  
penitus et domi inspexi,  
amarique ab eo laboraui,  
etsi non erat laborandum.

Est enim obuius et expositus,  
plenusque humanitate  
quam praecipit.

Atque utinam  
sic ipse  
quam spem tunc ille de me concepit  
impleuerim,  
ut ille multum uirtutibus suis addidit!

aut ego nunc illas magis miror  
quia magis intellego.

Quamquam ne nunc quidem  
satis intellego;

ut enim  
de pictore, scalptore, fiore  
nisi artifex iudicare,  
ita  
nisi sapiens  
non potest perspicere sapientem.

Quantum tamen mihi cernere datur,  
multa in Euphrate  
sic eminent et elucent,  
ut mediocriter quoque doctos aduertant et adficiant.

Disputat subtiliter, grauitate, ornate,  
frequenter  
etiam Platonice illam sublimitatem et latitudinem  
effingit.

Sermo est  
copiosus et uarius,  
dulcis in primis,  
et qui repugnantes quoque ducat, impellat.

Ad hoc  
proceritas corporis,  
decora facies,  
demissus capillus,  
ingens et cana barba;

quae licet fortuita et inania putentur,  
illi tamen plurimum uenerationis adquirunt.

Nullus horror in cultu,  
nulla tristitia,  
multum seueritatis;

reueraris occursum,  
non reformides.

Vitae sanctitas summa;  
comitas par:

insectatur uitia non homines,  
nec castigat errantes  
sed emendat.

Sequaris monentem attentus et pendens,  
et persuaderi tibi  
etiam cum persuaserit  
cupias.

Iam uero  
liberi tres,  
duo mares,  
quos diligentissime instituit.

Socer Pompeius Iulianus,  
cum ceterâ uitâ  
tum uel hoc uno  
magnus et clarus,  
quod ipse prouinciae princeps  
inter altissimas condiciones  
generum non honoribus principem,  
sed sapientiâ  
elegit.

Quamquam quid ego plura de uiro  
quo mihi frui non licet?

an  
ut magis angar  
quod non licet?

Nam dstringor officio,  
ut maximo  
sic molestissimo:

sedeo pro tribunali,  
subnoto libellos,  
conficio tabulas,  
scribo plurimas sed inlitteratissimas litteras.

Soleo non numquam  
(nam id ipsum quando contingit!)  
de his occupationibus apud Euphraten queri.

Ille me consolatur,  
adfirmat  
etiam esse hanc philosophiae et quidem pulcherrimam  
partem,  
agere negotium publicum,  
cognoscere,  
iudicare,  
promere et exercere iustitiam,  
quaeque ipsi doceant  
in usu habere.

Mihi tamen hoc unum non persuadet,  
satius esse ista facere  
quam  
cum illo dies totos  
audiendo discendoque consumere.

Quo magis  
te  
cui uacat  
hortor,  
cum in urbem proxime ueneris  
(uenias autem ob hoc maturius),  
illi te expoliendum limandumque permittas.

Neque enim ego  
ut multi  
inuideo aliis bono  
quo ipse careo,  
sed contra:

sensum quendam uoluptatemque percipio,  
si ea  
quae mihi denegantur  
amicis uideo superesse.

Vale.

## **I. 11 C. ~ PLINIUS FABIO IVSTO SVO S.**

Olim mihi nullas epistulas mittis.

Nihil est, inquis,  
quod scribam.

At hoc ipsum scribe,  
nihil esse quod scribas,  
uel solum illud

unde incipere priores solebant:

'Si uales,  
bene est;

ego ualeo.'

Hoc mihi sufficit;

est enim maximum.

Ludere me putas?

serio peto.

Fac sciam  
quid agas,  
quod sine sollicitudine summa  
nescire non possum.

Vale.

### **I. 12 C.~ PLINIVS CALESTRIO TIRONI SVO S.**

Iacturam grauissimam feci,  
si iactura dicenda est tanti uiri amissio.

Decessit Corellius Rufus  
et quidem sponte,  
quod dolorem meum exulcerat.

Est enim luctuosissimum genus mortis,  
quae  
non ex natura  
nec fatalis  
uidetur.

Nam  
utcumque in illis  
qui morbo finiuntur,  
magnum ex ipsa necessitate solacium est;

in iis uero  
quos accersita mors aufert,  
hic insanabilis dolor est,  
quod creduntur potuisse diu uiuere.

Corellium quidem summa ratio,  
quae sapientibus pro necessitate est,  
ad hoc consilium compulit,  
quamquam plurimas uiuendi causas habentem,  
optimam conscientiam,  
optimam famam,  
maximam auctoritatem,  
praeterea filiam, uxorem, nepotem, sorores,  
interque tot pignora  
ueros amicos.

Sed  
tam longa,  
tam iniqua ualetudine  
conflictabatur,  
ut haec tanta pretia uiuendi  
mortis rationibus uincerentur.

Tertio et tricensimo anno,  
ut ipsum audiebam,  
pedum dolore correptus est.

Patrius hic illi;

nam plerumque morbi quoque  
per successiones quasdam  
ut alia  
traduntur.

Hunc abstinentiâ, sanctitate,  
quoad uiridis aetas,  
uicit et fregit;

nouissime  
cum senectute ingrauescentem uiribus animi  
sustinebat,  
cum quidem incredibiles cruciatus et indignissima  
tormenta pateretur.

Iam enim dolor non pedibus solis  
ut prius  
insidebat,  
sed omnia membra peruagabatur.

Veni ad eum  
Domitiani temporibus  
in suburbano iacentem.

Serui e cubiculo recesserunt

(habebat hoc moris,  
quotiens intrasset fidelior amicus);  
quin etiam uxor  
quamquam omnis secreti capacissima digrediebatur.

Circumtulit oculos  
et  
'Cur' inquit  
'me putas  
hos tantos dolores tam diu sustinere?  
ut scilicet isti latroni uel uno die supersim.'

Dedisses huic animo par corpus,  
fecisset  
quod optabat.

Adfuit tamen deus uoto,  
cuius ille compos  
ut iam securus liberque moriturus,

multa illa uitae sed minora retinacula  
abrupit.

Increuerat ualetudo,  
quam temperantia mitigare temptauit;

perseuerantem constantia fugit.

Iam dies alter, tertius, quartus:  
abstinebat cibo.

Misit ad me uxor eius Hispulla  
communem amicum C.~Geminium  
cum tristissimo nuntio,  
destinasse Corellium mori  
nec  
aut suis aut filiae precibus  
inflecti;

solum superesse me,  
a quo reuocari posset ad uitam.

Cucurri.

Perueneram in proximum,  
cum mihi ab eadem Hispulla Iulius Atticus nuntiat  
nihil iam ne me quidem impetraturum:

tam obstinate magis ac magis induruisse.

Dixerat sane medico admouenti cibum:

**kekrika** ,  
quae uox  
quantum admirationis in animo meo  
tantum desiderii  
reliquit.

Cogito  
quo amico,  
quo uiro caream.

Impleuit quidem annum septimum et sexagensimum,  
quae aetas etiam robustissimis satis longa est;

scio.

Euasit perpetuam ualetudinem;

scio.

Decessit  
superstitibus suis,  
florente re publica,  
quae illi omnibus carior erat;

et hoc scio.

Ego tamen  
tamquam et iuuenis et firmissimi  
mortem doleo,  
doleo autem  
(licet me imbecillum putes)  
meo nomine.

Amisi enim,  
amisi  
uitae meae testem, rectorem, magistrum.

In summa  
dicam,  
quod  
recenti dolore  
contubernali meo Caluisio dixi:

'Vereor  
ne neglegentius uiuam.'

Proinde  
adhibe solacia mihi,  
non haec:

'Senex erat,  
infirmus erat'  
(haec enim noui),  
sed noua aliqua,  
sed magna,  
quae audierim numquam,  
legerim numquam.

Nam  
quae audiui,  
quae legi  
sponte succurrunt,  
sed  
tanto dolore superantur.

Vale.

### I. 13 C.~PLINIVS SOSIO SENECTIONI SVO S.

Magnum prouentum poetarum  
annus hic attulit:

toto mense Aprili  
nullus fere dies,  
quo non recitaret aliquis.

Iuuat me  
quod uigent studia,  
proferunt se ingenia hominum  
et ostentant,  
tametsi ad audiendum pigre coitur.

Plerique in stationibus sedent

tempusque audiendi fabulis conterunt,  
ac subinde sibi nuntiari iubent,  
an iam recitator intrauerit,  
an dixerit praefationem,  
an ex magna parte euoluerit librum;

tum demum ac tunc quoque  
lente cunctanterque ueniunt,  
nec tamen permanent,  
sed ante finem recedunt,  
alii dissimulanter et furtim,  
alii simpliciter et libere.

At hercule memoriâ parentum  
Claudium Caesarem ferunt,  
cum in Palatio spatiaeretur  
audissetque clamorem,  
causam requisisse,  
cumque dictum esset  
recitare Nonianum,  
subitum recitanti inopinatumque uenisse.

Nunc otiosissimus quisque  
multo ante rogatus  
et  
identidem admonitus  
aut non uenit  
aut,  
si uenit,  
queritur  
se diem  
(quia non perdidit)  
perdidisse.

Sed tanto magis laudandi probandique sunt,  
quos  
a scribendi recitandique studio  
haec auditorum uel desidia uel superbia  
non retardat.

Equidem prope nemini defui.

Erant sane plerique amici;

neque enim est fere quisquam,  
qui studia,  
ut non simul et nos amet.

His ex causis  
longius quam destinaueram tempus  
in urbe consumpsi.

Possum iam  
repetere secessum  
et  
scribere aliquid,  
quod non recitem,  
ne uidear,

quorum recitationibus adfui,  
non auditor fuisse  
sed creditor.

Nam  
ut in ceteris rebus  
ita in audiendi officio  
perit gratia  
si reposcatur.

Vale.

#### **I. 14 C.~ PLINIUS IVNIO MAVRICO SVO S.**

Petis  
ut fratris tui filiae prospiciam maritum;  
  
quod merito mihi potissimum iniungis.

Scis enim  
quanto opere summum illum uirum  
suspexerim dilexerimque,  
quibus ille adulescentiam meam exhortationibus  
fouerit,  
quibus etiam laudibus  
ut laudandus uiderer  
effecerit.

Nihil est quod  
a te mandari mihi  
aut maius aut gratius,  
nihil quod  
honestius a me suscipi  
possit,  
quam  
ut eligam iuuenem,  
ex quo nasci nepotes Aruleno Rustico deceat.

Qui quidem diu quaerendus fuisset,  
nisi paratus et quasi prouisus esset Minicius Acilianus,  
qui me  
ut iuuenis iuuenem  
(est enim minor pauculis annis)  
familiarissime diligit,  
reueretur  
ut senem.

Nam  
ita formari a me  
et institui  
cupit,  
ut ego a uobis solebam.

Patria est ei Brixia,  
ex illa nostra Italia  
quae multum adhuc  
uerecundiae, frugalitatis,

atque etiam rusticitatis antiquae,  
retinet ac seruat.

Pater Minicius Macrinus,  
equestris ordinis princeps,  
quia nihil altius uoluit;

adlectus enim a diuo Vespasiano inter praetorios  
honestam quietem  
huic nostrae ambitioni  
--dicam an dignitati?--  
constantissime praetulit.

Habet  
auiam maternam Serranam Proculam  
e municipio Patauio.

Nosti loci mores:

Serrana tamen Patauinis quoque  
seueritatis exemplum est.

Contigit et auunculus ei P.~Acilius  
grauitate, prudentia, fide prope singulari.

In summa  
nihil erit in domo tota,  
quod non tibi  
tamquam in tua  
placeat.

Aciliano uero ipsi  
plurimum uigoris, industriae,  
quamquam in maxima uerecundia.

Quaesturam, tribunatum, praeturam  
honestissime percucurrit,  
ac iam pro se  
tibi necessitatem ambiendi remisit.

Est illi facies liberalis,  
multo sanguine, multo rubore suffusa,  
est  
ingenua totius corporis pulchritudo  
et  
quidam senatorius decor.

Quae ego nequaquam arbitror neglegenda;

debet enim hoc  
castitati puellarum  
quasi praemium  
dari.

Nescio an adiciam  
esse patri eius amplas facultates.

Nam

cum imaginor uos  
quibus quaerimus generum,  
silendum de facultatibus  
puto;

cum publicos mores atque etiam leges ciuitatis intueor,  
quae uel in primis census hominum spectandos  
arbitrantur,  
ne id quidem praetereundum  
uidetur.

Et sane  
de posteris et his pluribus cogitanti,  
hic quoque in condicionibus deligendis  
ponendus est calculus.

Tu fortasse me putes indulsisse amori meo,  
supraque ista  
quam res patitur  
sustulisse.

At ego fide mea  
spondeo futurum  
ut  
omnia longe ampliora  
quam a me praedicantur  
inuenias.

Diligo quidem adolescentem ardentissime  
sicut meretur;

sed hoc ipsum amantis est,  
non onerare eum laudibus.

Vale.

## I. 15 C.~PLINIVS SEPTICIO CLARO SVO S.

Heus tu!

promittis ad cenam,  
nec uenis?

Dicitur ius:

ad assem impendium reddes,  
nec id modicum.

Paratae erant  
lactuae singulae,  
cochleae ternae,  
oua bina,  
halica cum mulso et niue  
(nam hanc quoque computabis,  
immo hanc in primis  
quae perit in ferculo),  
oliuae, betacei, cucurbitae bulbi,

alia mille non minus lauta.

Audisses comoedos  
uel lectorem uel lyristen uel  
(quae mea liberalitas)  
omnes.

At tu apud nescio quem  
ostrea, uuluas, echinos Gaditanas maluisti.

Dabis poenas,  
non dico quas.

Dure fecisti:

inuidisti,  
nescio an tibi,  
certe mihi,  
sed tamen et tibi.

Quantum nos luissemus, risissemus, studuissemus!

Potes adparatius cenare apud multos,  
nusquam hilarius, simplicius, incautius.

In summa experire,  
et  
nisi postea te aliis potius excusaueris,  
mihi semper excusa.

Vale.

## **I. 16 C.~ PLINIVS ERVCIO SVO S.**

Amabam Pompeium Saturninum  
(hunc dico nostrum)  
laudabamque eius ingenium,  
etiam antequam scirem,  
quam uarium, quam flexibile, quam multiplex esset;

nunc uero totum me tenet, habet, possidet.

Audiui causas agentem acriter et ardentem,  
nec minus polite et ornate,  
siue meditata siue subita  
proferret.

Adsunt aptae crebraeque sententiae,  
grauis et decora constructio,  
sonantia uerba et antiqua.

Omnia haec mire placent  
cum impetu quodam et flumine peruehuntur,  
placent  
si retractentur.

Senties quod ego,

cum orationes eius in manus sumpseris,  
quas facile cuilibet ueterum,  
quorum est aemulus,  
comparabis.

Idem tamen in historia magis satisfaciet  
uel breuitate uel luce uel suauitate uel splendore  
etiam et sublimitate narrandi.

Nam in contionibus  
eadem quae in orationibus uis est,  
pressior tantum  
et circumscriptior  
et adductior.

Praeterea facit uersus,  
quales Catullus meus aut Caluus,  
re uera quales Catullus aut Caluus.

Quantum illis  
leporis, dulcedinis, amaritudinis, amoris!

inserit sane,  
sed data opera,  
mollibus leuibusque duriusculos quosdam;

et hoc quasi Catullus aut Caluus.

Legit mihi nuper epistulas;

uxoris esse dicebat.

Plautum uel Terentium metro solutum  
legi credidi.

Quae siue uxoris sunt  
ut adfirmat,  
siue ipsius  
ut negat,  
pari gloriâ dignus,  
qui  
aut illa componat,  
aut uxorem quam uirginem accepit,  
tam doctam politamque reddiderit.

Est ergo mecum per diem totum;

eundem antequam scribam,  
eundem cum scripsi,  
eundem etiam cum remittor,  
non tamquam eundem lego.

Quod te quoque  
ut facias  
et hortor et moneo;

neque enim debet  
operibus eius obesse

quod uiuit.

An  
si inter eos  
quos numquam uidimus  
florisset,  
non solum libros eius  
uerum etiam imagines  
conquireremus,  
eiusdem nunc honor praesentis et gratia  
quasi satietate languescit?

At hoc prauum malignumque est,  
non admirari hominem admiratione dignissimum,  
quia uidere, adloqui, audire, complecti,  
nec  
laudare tantum  
uerum etiam amare  
contingit.

Vale.

### **I. 17 C.~ PLINIVS CORNELIO TITIANO SVO S.**

Est adhuc curae hominibus fides et officium,  
sunt qui defunctorum quoque amicos agant.

Titinius Capito ab imperatore nostro impetrauit,  
ut sibi liceret  
statuam L.~Silani in foro ponere.

Pulchrum et magna laude dignum  
amicitiâ principis in hoc uti,  
quantumque gratiâ ualeas,  
aliorum honoribus experiri.

Est omnino Capitoni in usu  
claros uiros colere;

mirum est  
qua religione, quo studio  
imagines Brutorum, Cassiorum, Catonum domi  
ubi potest  
habeat.

Idem  
clarissimi cuiusque uitam  
egregiis carminibus exornat.

Scias  
ipsum plurimis uirtutibus abundare,  
qui alienas sic amat.

Redditus est Silano debitus honor,  
cuius immortalitati Capito prospexit pariter et suae.

Neque enim magis decorum et insigne est

statuam in foro populi Romani habere  
quam ponere.

Vale.

### **I. 18 C.~ PLINIVS SVETONIO TRANQVILLO SVO S.**

Scribis  
te perterritum somnio uereri  
ne quid aduersi in actione patiaris;

rogas  
ut dilationem petam,  
et pauculos dies,  
certe proximum,  
excusem.

Difficile est,  
sed experiar,  
**ka i`ga r' t' oħa r ek dioj eħtin**

Refert tamen,  
euentura soleas  
an contraria  
somniaire.

Mihi reputanti somnium meum  
istud,  
quod times tu,  
egregiam actionem portendere  
uidetur.

Susceperam causam Iuni Pastoris,  
cum mihi quiescenti uisa est  
socrus mea aduoluta genibus  
ne agerem obsecrare;

et eram acturus adulescentulus adhuc,  
eram in quadruplici iudicio,  
eram contra potentissimos ciuitatis  
atque  
etiam Caesaris amicos,  
quae singula  
excutere mentem mihi  
post tam triste somnium  
poterant.

Egi tamen  
**l ogis a ĩemoj** illud  
**eif o iħmoj a ĩisto j**  
**a ĩuħesqa i peri`pa trħj .**

Nam mihi patria,  
et si quid carius patriâ,  
fides uidebatur.

Prosperè cessit,  
atque adeo  
illa actio mihi aures hominum,  
illa ianuam famae patefecit.

Proinde dispice  
an tu quoque sub hoc exemplo  
somnia istud in bonum uertas;

aut si tutius putas  
illud cautissimi cuiusque praeceptum  
'Quod dubites,  
ne feceris',  
id ipsum rescribe.

Ego aliquam stropham inueniam  
agamque causam tuam,  
ut istam agere  
tu cum uoles  
possis.

Est enim sane alia ratio tua,  
alia mea fuit.

Nam iudicium centumuirale  
differrī nullo modo,  
istuc aegre quidem  
sed tamen potest.

Vale.

### **I. 19 C.~ PLINIVS ROMATIO FIRMO SVO S.**

Municeps tu meus  
et condiscipulus  
et ab ineunte aetate contubernalis,  
pater tuus  
et  
matri et auunculo meo,  
mihi etiam  
quantum aetatis diuersitas passa est,  
familiaris:

magnae et graues causae,  
cur suscipere, augere dignitatem tuam debeam.

Esse autem tibi centum milium censum,  
satis indicat  
quod apud nos decurio es.

Igitur  
ut te  
non decurione solum  
uerum etiam equite Romano  
perfruamur,  
offero tibi  
ad implendas equestres facultates

trecenta milia nummum.

Te memorem huius muneris  
amicitiae nostrae diuturnitas spondet:

ego ne illud quidem admoneo,  
quod admonere deberem,  
nisi scirem sponte facturum,  
ut dignitate a me data  
quam modestissime  
ut a me data  
utare.

Nam sollicitius custodiendus est honor,  
in quo  
etiam beneficium amici tuendum est.

Vale.

### **I. 20 C.~ PLINIVS CORNELIO TACITO SVO S.**

Frequens mihi disputatio est  
cum quodam docto homine et perito,  
cui nihil  
aeque in causis agendis ut breuitas  
placet.

Quam ego custodiendam esse confiteor,  
si causa permittat:

alioqui praeuaricatio est transire dicenda,  
praeuaricatio etiam cursim et breuiter attingere  
quae sint inculcanda, infigenda, repetenda.

Nam plerisque longiore tractatu  
uis quaedam et pondus accedit,  
utque corpori ferrum,  
sic oratio animo  
non ictu magis quam morâ  
imprimitur.

Hic ille mecum auctoritatibus agit  
ac  
mihi ex Graecis orationes Lysiae ostentat,  
ex nostris Gracchorum Catonisque,  
quorum sane plurimae sunt circumcisae et breues:

ego  
Lysiae  
Demosthenen, Aeschinen, Hyperiden multosque  
praeterea,  
Gracchis et Catoni  
Pollionem, Caesarem, Caelium, in primis M.~Tullium  
oppono,  
cuius oratio optima fertur esse  
quae maxima.

Et hercule  
ut aliae bonae res  
ita bonus, liber, melior est quisque  
quo maior.

Vides  
ut statuas, signa, picturas,  
hominum denique multorumque animalium formas,  
arborum etiam,  
si modo sint decorae,  
nihil magis quam amplitudo commendet.

Idem orationibus euenit;

quin etiam uoluminibus ipsis  
auctoritatem quandam et pulchritudinem  
adicit magnitudo.

Haec ille multaque alia,  
quae a me in eandem sententiam solent dici,  
ut est in disputando incomprehensibilis et lubricus,  
ita eludit  
ut contendat hos ipsos,  
quorum orationibus nitar,  
pauciora dixisse  
quam ediderint.

Ego contra puto.

Testes sunt multae multorum orationes  
et Ciceronis pro Murena pro Vareno,  
in quibus breuis et nuda  
quasi subscriptio quorundam criminum  
solis titulis indicatur.

Ex his adparet  
illum permulta dixisse,  
cum ederet  
omississe.

Idem pro Cluentio ait  
se totam causam uetere instituto solum perorasse,  
et pro C.~ Cornelio quadriduo egisse,  
ne dubitare possimus,  
quae per plures dies  
(ut necesse erat)  
latius dixerit,  
postea recisa ac repurgata  
in unum librum  
grandem quidem unum tamen  
coartasse.

At  
aliud est actio bona,  
aliud oratio.

Scio  
nonnullis ita uideri,

sed ego  
(forsitan fallar)  
persuasum habeo  
posse fieri  
ut sit actio bona  
quae non sit bona oratio,  
non posse non bonam actionem esse  
quae sit bona oratio.

Est enim oratio  
actionis exemplar  
et quasi ~~arxetupon~~

Ideo in optima quaque  
mille figuras extemporales inuenimus,  
in iis etiam quas tantum editas scimus,  
ut in Verrem:

'artificem quem?  
quemnam?  
recte admones;  
Polyclitum esse  
dicebant.'

Sequitur ergo  
ut actio sit absolutissima,  
quae maxime orationis similitudinem expresserit,  
si modo iustum et debitum tempus accipiat;

quod si negetur,  
nulla oratoris  
maxima iudicis culpa est.

Adsunt huic opinioni meae leges,  
quae longissima tempora largiuntur  
nec breuitatem dicentibus  
sed copiam  
(hoc est diligentiam)  
suadent;

quam praestare  
nisi in angustissimis causis  
non potest breuitas.

Adiciam  
quod me docuit usus,  
magister egregius.

Frequenter egi,  
frequenter iudicaui,  
frequenter in consilio fui:

aliud alios mouet,  
ac plerumque paruae res maximas trahunt.

Varia sunt hominum iudicia,  
uariae uoluntates.

Inde  
qui eandem causam simul audierunt,  
saepe diuersum,  
interdum idem  
sed ex diuersis animi motibus  
sentiunt.

Praeterea suae quisque inuentioni fauet,  
et quasi fortissimum amplectitur,  
cum ab alio dictum est  
quod ipse praeuidit.

Omnibus ergo dandum est aliquid  
quod teneant,  
quod agnoscant.

Dixit aliquando mihi Regulus,  
cum simul adessemus:

'Tu omnia  
quae sunt in causa  
putas exsequenda;

ego iugulum  
statim uideo,  
hunc premo.'

Premittit sane quod elegit,  
sed in eligendo frequenter errat.

Respondi posse fieri,  
ut genu esset aut talus,  
ubi ille iugulum putaret.

At ego,  
inquam,  
qui iugulum perspicere non possum,  
omnia pertempto,  
omnia experior,  
**parta** denique **liqon kinw=**

utque in cultura agri  
non uineas tantum,  
uerum etiam arbusta,  
nec arbusta tantum  
uerum etiam campos  
curo et exerceo,  
utque  
in ipsis campis  
non far aut siliginem solam,  
sed hordeum, fabam, ceteraque legumina sero,  
sic  
in actione  
plura quasi semina latius spargo,  
ut  
quae prouenerint  
colligam.

Neque enim  
minus imperspicua, incerta, fallacia sunt  
iudicum ingenia  
quam tempestatum terrarumque.

Nec me praeterit  
summum oratorem Periclen  
sic a comico Eupolide laudari:

**pro] de/g' a utou=tw=ta xei**  
**peiqw/tij epekaqhto toisi xeilesin**  
**oucwj ekhlei, kai imonj twarhthorwn**  
**to kentronegka teleipe toij akrowmeonj.**

Verum huic ipsi Pericli  
nec illa **peiqw\**  
nec illud **ekhlei**  
breuitate uel uelocitate uel utrâque  
(differunt enim)  
sine facultate summa  
contigisset.

Nam delectare, persuadere  
copiam dicendi spatiumque desiderat,  
relinquere uero aculeum in audientium animis  
is demum potest  
qui non pungit sed infigit.

Adde  
quae de eodem Pericle comicus alter:

**h]strapt', ebroita, sunekuka thh \*ellada.**

Non enim amputata oratio et abscisa,  
sed lata et magnifica et excelsa  
tonat, fulgurat,  
omnia denique  
perturbat ac miscet.

'Optimus tamen modus est':  
quis negat?

sed non minus non seruat modum  
qui infra rem  
quam qui supra,  
qui adstrictius  
quam  
qui effusius dicit.

Itaque audis frequenter  
ut illud:

'immodice et redundanter',  
ita hoc:

'ieiune et infirme'.

Alius excessisse materiam,  
alius dicitur  
non implesse.

Aeque uterque,  
sed  
ille imbecillitate, hic uiribus  
peccat;

quod certe  
etsi non limatoris,  
maioris tamen ingeni  
uitium est.

Nec uero  
cum haec dico  
illum Homericum **αμετροεφ** ~~π~~robo,  
sed hunc:

**καὶ ἔπειτα νίφασσιν ἐπικράτα ξεμερήσιν,**  
non quia non et ille mihi ualdissime placeat:

**παύσα μὲν, ἀλλὰ μάλα λίγῳ:**

si tamen detur electio,  
illam orationem similem niuibus hibernis,  
id est crebram et adsiduam sed et largam,  
postremo diuinam et caelestem  
uolo.

'At est gratior multis  
actio breuis.'

Est,  
sed inertibus,  
quorum delicias desidiamque  
quasi iudicium respicere  
ridiculum est.

Nam  
si hos in consilio habeas,  
non solum satius breuiter dicere,  
sed omnino non dicere.

Haec est adhuc sententia mea,  
quam mutabo  
si dissenseris tu;

sed plane  
cur dissentias  
explices rogo.

Quamuis enim  
cedere auctoritati tuae debeam,  
rectius tamen arbitror  
in tanta re  
ratione quam auctoritate

superari.

Proinde,  
si non errare uideor,  
id ipsum  
quam uoles breui epistolâ,  
sed tamen scribe  
(confirmabis enim iudicium meum);

si erraro,  
longissimam para.

Num corrupe te,  
qui tibi  
si mihi accederes  
breuis epistolae necessitatem,  
si dissentires,  
longissimae  
imposui?

Vale.

## I. 21 C. ~ PLINIVS PLINIO PATERNO SVO S.

Ut animi tui iudicio  
sic oculorum  
plurimum tribuo,  
non quia multum  
(ne tibi placeas)  
sed quia tantum quantum ego sapis;

quamquam hoc quoque multum est.

Omissis iocis  
credo  
decentes esse seruos,  
qui sunt empti mihi  
ex consilio tuo.

Superest  
ut frugi sint,  
quod de uenalibus  
melius auribus quam oculis  
iudicatur.

Vale.

## I. 22 C. ~ PLINIVS CATILIO SEVERO SVO S.

Diu iam in urbe haereo  
et quidem attonitus.

Perturbat me  
longa et pertinax ualetudo Titi Aristonis,  
quem singulariter et miror et diligo.

Nihil est enim illo grauius, sanctius, doctius,  
ut mihi  
non unus homo  
sed litterae ipsae omnesque bonae artes  
in uno homine  
summum periculum adire  
uideantur.

Quam peritus ille  
et priuati iuris  
et publici!

quantum rerum,  
quantum exemplorum,  
quantum antiquitatis tenet!

Nihil est  
quod discere uelis  
quod ille docere  
non possit;

mihi certe  
quotiens aliquid abditum quaero,  
ille thesaurus est.

Iam quanta sermonibus eius fides,  
quanta auctoritas,  
quam pressa et decora cunctatio!

quid est  
quod non statim sciat?

Et tamen plerumque  
haesitat, dubitat,  
diuersitate rationum,  
quas  
acri magnoque iudicio  
ab origine causisque primis  
repetit, discernit, expendit.

Ad hoc  
quam parcus in uictu,  
quam modicus in cultu!

Soleo  
ipsum cubiculum illius ipsumque lectum  
ut imaginem quandam priscae frugalitatis  
adspicere.

Ornat haec  
magnitudo animi,  
quae  
nihil ad ostentationem,  
omnia ad conscientiam  
refert  
recteque facti  
non ex populi sermone mercedem,  
sed ex facto

petit.

In summa  
non facile quemquam ex istis  
qui sapientiae studium habitu corporis praeferunt,  
huic uiro comparabis.

Non quidem gymnasia sectatur aut porticus,  
nec disputationibus longis  
aliorum otium suumque delectat,  
sed in toga negotiisque uersatur,  
multos aduocatione, plures consilio iuuat.

Nemini tamen  
istorum castitate, pietate, iustitia, fortitudine  
etiam primo loco cesserit.

Mirareris  
si interesses,  
quâ patientiâ hanc ipsam ualetudinem toleret,  
ut dolori resistat,  
ut sitim differat,  
ut incredibilem febrium ardorem  
immutus opertusque transmittat.

Nuper me paucosque mecum,  
quos maxime diligit,  
aduocauit rogauitque,  
ut medicos consuleremus de summa ualetudinis,  
ut  
si esset insuperabilis  
sponte exiret e uita;

si tantum difficilis et longa,  
resisteret maneretque:

dandum enim precibus uxoris,  
dandum filiae lacrimis,  
dandum etiam nobis amicis,  
ne spes nostras,  
si modo non essent inanes,  
uoluntariâ morte desereret.

Id ego  
arduum in primis  
et  
praecipua laude dignum  
puto.

Nam  
impetu quodam et instinctu  
procurrere ad mortem  
commune cum multis,  
deliberare uero  
et  
causas eius expendere,  
utque suaserit ratio,  
uitae mortisque consilium

uel suscipere uel ponere  
ingentis est animi.

Et medici quidem  
secunda nobis pollicentur:

superest  
ut promissis deus adnuat  
tandemque me hac sollicitudine exsoluat;

quâ liberatus  
Laurentinum meum,  
hoc est libellos et pugillares,  
studiosumque otium repetam.

Nunc enim  
nihil legere,  
nihil scribere  
aut adsidenti uacat  
aut anxio libet.

Habes  
quid timeam,  
quid optem,  
quid etiam in posterum destinem:

tu  
quid egeris,  
quid agas,  
quid uelis agere inuicem nobis,  
sed laetioribus epistulis scribe.

Erit confusioni meae non mediocri solacium,  
si tu nihil quereris.

Vale.

### **I. 23 C.~ PLINIVS POMPEIO FALCONI SVO S.**

Consulis  
an existimem  
te in tribunatu causas agere debere.

Plurimum refert,  
quid esse tribunatum putes,  
inanem umbram et sine honore nomen  
an potestatem sacrosanctam,  
et quam in ordinem cogi  
ut a nullo  
ita ne a se quidem  
deceat.

Ipse cum tribunus essem,  
errauerim fortasse  
qui me esse aliquid  
putaui,  
sed tamquam essem

abstinui causis agendis:

primum quod deforme arbitrabar,  
cui adsurgere  
cui loco cedere omnes oporteret,  
hunc omnibus sedentibus stare,  
et qui iubere posset tacere quemcumque,  
huic silentium clepsydrâ indici,  
et quem interfari nefas esset,  
hunc etiam conuicia audire  
et  
si inulta pateretur inertem,  
si ulcisceretur insolentem uideri.

Erat hic quoque aestus ante oculos,  
si forte me adpellasset  
uel ille cui adessem,  
uel ille quem contra,  
intercederem  
et auxilium ferrem  
an quiescerem sileremque,  
et quasi eiurato magistratu priuatum  
ipse me facerem.

His rationibus motus  
malui  
me tribunum omnibus  
exhibere  
quam paucis aduocatum.

Sed tu  
(iterum dicam)  
plurimum interest  
quid esse tribunatum putes,  
quam personam tibi imponas;

quae sapienti uiro ita aptanda est  
ut perferatur.

Vale.

### **I. 24 C.~ PLINIVS BAEBIO HISPANO SVO S.**

Tranquillus contubernalis meus  
uult emere agellum,  
quem uenditare amicus tuus dicitur.

Rogo cures,  
quanti aequum est  
emat;

ita enim delectabit emisse.

Nam mala emptio semper ingrata,  
eo maxime quod  
exprobrare stultitiam domino uidetur.

In hoc autem agello,  
si modo adriserit pretium,  
Tranquilli mei stomachum multa sollicitant,  
uicinitas urbis,  
opportunitas uiae,  
mediocritas uillae,  
modus ruris,  
qui auocet  
magis quam dstringat.

Scholasticis porro dominis,  
ut hic est,  
sufficit abunde tantum soli,  
ut releuare caput,  
reficere oculos,  
reptare per limitem  
unamque semitam terere  
omnesque uiteculas suas nosse  
et numerare arbusculas  
possint.

Haec tibi exposui,  
quo magis scires,  
quantum esset ille mihi, ego tibi, debiturus,  
si praediolum istud,  
quod commendatur his dotibus,  
tam salubriter emerit  
ut paenitentiae locum non relinquat.

Vale.